



## ALTERNATIVNA KRIVIČNA SANKCIJA RAD ZA OPĆE DOBRO NA SLOBODI

U skladu sa odredbama člana 44. stav 7. Krivičnog zakona Federacije Bosne i Hercegovine, („Službene novine Federacije Bosne i Hercegovine“, broj: 36/03, 37/03, 21/04, 69/04, 18/05, 42/10, 42/11, 59/14 i 76/14), **Ministarstvo pravde i uprave Kantona Sarajevo je organ nadležan za izvršavanje alternativne krivične sankcije rad za opće dobro na slobodi, na području Kantona Sarajevo.**

**Rad za opće dobro na slobodi je alternativna krivična sankcija kojom se počiniocima krivičnih djela za koja je zapriječena kazna zatvora u trajanju do jedne godine, ista uz dobrovoljni pristanak osuđenog, zamjenjuje društveno korisnim radom – radom za opće dobro na slobodi, u trajanju od najmanje deset, do najviše devedeset radnih dana.**

**Raspon** izrečene sankcije rada za opće dobro na slobodi, zavisi od dužine trajanja utvrđene zatvorske kazne.

**Svrha kažnjavanja se postiže** na način da osoba kojoj je ograničena sloboda ne bude isključena iz društva, već da uz pomoć društvene zajednice, dobrovoljno, radom i ličnim postupcima, razvije svijest i odgovornost o štetnosti određenih ponašanja i posljedicama počinjenog krivičnog djela.

Ukoliko osuđena osoba **ne pristupi izvršavanju, prekine izvršavanje, ili zanemaruje izvršavanje rada za opće dobro na slobodi**, o tome Ministarstvo pravde i uprave Kantona Sarajevo bez odlaganja obavještava nadležni sud koji je izrekao sankciju, radi zamjene rada za opće dobro na slobodi već izrečenom kaznom zatvora.

Rad za opće dobro na slobodi, **obavlja se u organizacijama od javnog interesa osnovanim na području Kantona Sarajevo**, a koje organizacije obavljaju javnu djelatnost u okviru koje se može ostvariti opća i posebna svrha izvršavanja krivično-pravnih sankcija.

Ove organizacije, čiju **listu utvrđuje Ministarstvo pravde i uprave Kantona Sarajevo**, predstavljaju poslodavca u postupku izvršavanja rada za opće dobro na slobodi, s kojim Ministarstvo pravde i uprave Kantona Sarajevo potpisuje ugovore o izvršavanju rada za opće dobro na slobodi. Predmetni ugovori imaju jednogodišnji rok važenja, sa mogućnošću produženja.

Ministarstvo pravde i uprave Kantona Sarajevo, za period maj 2015. godine – maj 2016. godine, potpisalo je i primjenjuje ugovore o izvršavanju rada za opće dobro na slobodi sa **kantonalnim javnim komunalnim preduzećima Park, Rad, Gradski saobraćaj i Pokop**, u koja se preduzeća upućuju osuđene osobe na izvršavanje rada za opće dobro na slobodi, a za koju namjenu je **predviđeno trideset radnih mjesta.**



Pored kontinuiranog nadzora od strane Ministarstva pravde i uprave Kantona Sarajevo, **neposredan nadzor nad izvršavanjem rada za opće dobro na slobodi u kantonalnim javnim komunalnim preduzećima, obavljaju uposlenici ovih preduzeća – povjerenici za izvršavanje rada za opće dobro na slobodi.**

Povjerenici za izvršavanje rada za opće dobro na slobodi, za potrebe neposrednog nadzora nad izvršavanjem rada za opće dobro na slobodi, prošli **su posebnu obuku u Ministarstvu pravde i uprave Kantona Sarajevo.**

**Ministarstvo pravde i uprave Kantona Sarajevo, svojim kapacitetima, kontinuiranom saradnjom sa Općinskim sudom u Sarajevu, te navedenim komunalnim javnim kantonalnim preduzećima koja svoju funkciju obavljaju na području Kantona Sarajevo, stalnim radom sa osobama kojima je izrečena alternativna krivična sankcija rad za opće dobro na slobodi, kao i zajedničkim djelovanjem sa povjerenicima za izvršavanje rada za opće dobro na slobodi, obezbjeđuje sve potrebne uslove za izvršavanje rada za opće dobro na slobodi i na zakonit način, sa punim postizanjem svrhe kažnjavanja, izvršava presude nadležnog suda kojima je izrečena ova alternativa krivična sankcija.**

**pripremio:  
Edo Hadžović**

---

**MINISTAR**

**Mario Nenadić**

